

四庫全書

集部

欽定四庫全書

集部

漢魏六朝百三家集卷

四十一

詳校官庶吉士_臣謝恭銘

主事銜_臣徐以坤覆勘

總校官檢討_臣何思鈞

校對官編修_臣吳舒帷

謄錄監生_臣黃鑫

欽定四庫全書

漢魏六朝百三家集卷四十

晉張華集題詞

張壯武博物君子晉室老臣彌縫暗主虐后之
間足稱補袞竟以猶豫族誅橫尸前殿悲哉壯
武初未知名作鷦鷯賦以寄意感其不才善全
有莊周木鴈之思既賦相風朽社亦躊躇於在
高戒險盛衰交心及陟台司不祥數見中台星

圻少子肆勸其遜位猶戀弗忍決漢王京兆不
念牛衣遂沉牢獄然死以直諫誠重泰山壯武
豈忘牧羊時乎名位已極篤於守經徒為賈氏
而死適資人口耳晁氏書目云張司空集有詩
一百二十哀詞冊文二十一賦三今余所綴輯
賦數過之丈不及全詩歌八十餘中間拂舞白
紵舞杯槃舞諸篇晉代無名氏之作藏書家本
亦有繫之張司空集者然觀其壯健頓挫類非

司空溫麗之素餘詩平雅近代詩家深貶其博
學為累豈所謂聽古樂而卧乎壯武文章賦最
蒼深文次之詩又次之大抵去漢不遠猶存張
蔡之遺詩數論詩晉以下若茂先勵志廣微補
亡季倫吟歎等曲尚有前代典刑余於司空諸
文亦云

目錄

賦

鵲鵲賦

有序

歸田賦

相風賦

有序

永懷賦

感婚賦

有序

朽社賦

瓌材枕賦

豆羹賦

表

上壽食舉歌詩表

薦成公綏表

議

封禪議

晉丈王謚議

廢黜武悼楊太后議

哀策

金史卷一百一十五
卷四十四
武帝哀策文

武元楊皇后策文

誄

章懷皇后誄

魏劉驃騎誄

列文先生鮑玄泰誄

箴

女史箴

大司農箴

尚書令箴

環材枕箴

銘

倚几銘

杖銘

書

與褚陶書

報雷煥書

暫西帖

問

甲乙問

序

博物志序

贊

博物志地理畧贊

樂歌

晉四廂樂歌

王公上壽詩

食舉東西廂樂詩

其二

其三

其四

其五

其六

其七

其八

其九

其十

其十一

正旦大會行禮詩

其二

其三

其四

晉冬至初歲小會歌

晉宴會歌

晉中宮所歌

晉宗親會歌

晉正德大豫舞歌

正德舞歌

大豫舞歌

晉凱歌

命將出征歌

勞還師歌

晉白紵舞歌詩

其二

其三

晉杯槃舞歌詩

拂舞歌三首

白鳩篇

獨漉篇

濟濟篇

詩

遊獵篇

遊俠篇

博陵王宮俠曲

其二

門有車馬客行

輕薄篇

壯士篇

蕭史曲

祖道征西應詔詩

祖道趙王應詔詩

太康六年三月三日後園會詩

其二

其三

其四

上巳篇

勵志詩

其二

其三

其四

其五

其六

其七

其八

其九

答何劭

其二

其三

情詩

其二

其三

其四

其五

感婚詩

雜詩

其二

其三

擬古

遊仙詩

其二

其三

贈摯仲洽詩

招隱

其二

荷詩

橘詩

漢魏六朝百三家集卷四十目錄

欽定四庫全書

漢魏六朝有三家集卷四十

明 張溥 輯

晉張華集

賦

鷦鷯賦

有序

鷦鷯小鳥也生於蒿萊之間長於藩籬之下翔集尋常之內而生生之理足矣色淺體陋不為人用形微處卑

物莫之害繁滋族類乘居匹遊翩翩然有以自樂也彼
驚鶚鷗鴻孔雀翡翠或陵赤霄之際或託絕垠之外翰
舉足以冲天背距足以自衛然皆負矰嬰繳羽毛入貢
何者有用於人也夫言有淺而可以託深類有微而可
以喻大故賦之云爾

何造化之多端兮播羣形於萬類惟鷗鷯之微禽兮亦
攝生而受氣育翩翾之陋體兮無玄黃以自貴毛弗施
於器用兮肉不登乎俎味鷹鷂過猶俄翼兮尚何懼於

量爵翳薈蒙龍是焉遊集飛不飄颻翔不翕習其居易
容其求易給巢林不過一枝每食不過數粒棲無所滯
遊無所盤匪陋荆棘匪榮蒞蘭動翼而逸投足而安委
命順理與物無患伊茲禽之無知兮何處身之似智不
懷寶以賈害兮不飾表以招累靜守約而不矜動因循
以簡易任自然以為資無誘慕於世偽鵬鵠介其背距
鵠鷺軼於雲際鷄竄於幽險孔翠生於遐裔彼晨鳧
與歸鴈又矯翼而增逝咸美羽而豐肌故無臯而皆斃

徒銜蘆以避繳終為戮於此世蒼鷹鷂而受紕鸚鵡慧
而入籠屈猛志以服養塊幽繫於九重變音聲以順旨
思摧翮而為庸戀鍾岱之林埜慕壠坻之高松雖蒙幸
於今日未若疇昔之從容海鳥爰居避風而至條枝巨
雀踰嶺自致提挈萬里飄颻逼畏夫唯體大妨物而形
壞足瑋也陰陽陶蒸萬品一區巨細舛錯種繁類殊鷗
螟巢於蚊睫大鵬彌乎天隅將以上方不足下比有餘
普天壤而遐觀吾又安知其大小之所如

歸田賦

隨陰陽之開闔從時宜以卷舒冬與處以城邑春遊放
於田廬歸郊鄒之舊里託言靜以閒居育草木之藹蔚
因地勢之丘墟豐蔬果之林錯茂桑麻之紛敷用天道
以取資行藥物以為娛時逍遙於洛濱聊相羊以縱意
目白沙與積礫玩衆卉之同異揚素波以濯足泝清澗
以蕩思低徊往留棲遲菴藹存神忽微遊精域外藉纖
草以為茵援垂陰以為蓋瞻高鳥之陵風臨鯨魚於清

瀨眇萬物而遠觀修自然之通會以退足於一壑故處
否而忘泰

相風賦

有序

大史候部有相風在西城上而作者弗為豈以其託處
幽閒達衆特立無羽毛之飾而丹漆不為之容乎

蓋在先聖衛濟生人擬論天地錯綜明神在璿璣以齊
七政象渾儀於陶鈞考古旁於六氣仰貞觀於三辰爰
在保章世序其職辨風候方必立唯極循物致用器不

假飾眇脩幹之迢迢凌高墉而莖植玄鳥偏其增翬跡
雲霄而矯翼嘉創制之窮理諒器淺而事深步元氣於
尋木寄先識於茲禽既在高而思危又戒險而自箴雖
迴易之無常終守正而不淫永格立以彌世志淹滯而
愈新超無返而特存差偶景而為鄰

求懷賦

美淑人之妖豔因盼睐而傾城揚綽約之麗姿懷婉婉
之柔情超六列於往古邁來今之清英既惠余以至懽

又結我以同心交恩好之款固接情愛之分深誓中誠
於曠日要執契以斷金嗟夫天衢幽昧差錯繆於參差
怨祿運之不遭雖義結而絕離執纏綿之篤趣守德音
以終始邀幸會於有期冀容華之我俟儻皇靈之垂仁
長收懽於永已

感婚賦

有序

方今歲在己巳將次四仲婚姻者競赴良時粲麗之觀
相繼於路嫁娶之會不乏乎目乃作感婚賦曰

彼婚姻之俗忌兮惡當梁之在斯逼來年之將至今迨
星紀之未移窈窕初茂玉質始盛容華外豐心神內正
接軫連騎隱隱習習充街塞里暉曜城邑相麗姿之綽
約兮遙髣髴以感心怨佳人之幽翳兮恨檢防之高深

一本無彼
婚姻四句

朽社賦 有序

高栢橋南大道傍有古槐樹蓋數百年木也余少居近
之後去行路遇之則已朽意有緬然輒為之賦因以言

衰盛之理云爾

伊茲槐之挺植於京路之東隅得託尊於田主據爽塏
以高居垂重陰於道周臨大路之通衢饗春秋之所報
應豐腴於無射歷漢京之康樂踰喪亂之橫逆朱夏當
陽蒹藹蕭森征夫雲會行旅歸心輜軒停蓋輕輿託陰
吉人向風而祛袂王孫清嘯而啓襟晞甘棠之廣覆徧
喬木之無陰

環材枕賦

一作
張紘

有卓爾之殊瓌超詭異之邈絕且其材色也如芸之黃
其為香也如蘭之芳其文彩也如霜地而金莖紫葉而
紅榮有若蒲桃之蔓延或如兔絲之煩縈有若嘉禾之
垂穎又似靈芝之吐英其似木者有類桂枝之闌干或
象灌木之叢生其似鳥者或似驚鶴之徑逝或類鴻鵠
之上征有若孤雌之無味或效鴛鴦之交頸紛雲興而
氣蒸般星羅而流精何衆文之炯朗灼燦燭而發明曲
有所方事有所成每則異姿動各殊名衆夥不可殫形

制為方枕四角正端會緻密固絕際無間形妍體法既麗且閒高卑得適辟堅每安不屑朱碧之飾助不煩錐鋒之鐫鏤無丹漆之形朱罔觴象之佐副較程形而靈露衆妙該而悉備珪璋特達璆璫富也美梓逡巡不敢與竝相思庶幾晞風於末列神龍之姿衆鱗相絕昔詩人稱角枕之粲季世加以錦繡之飾皆比集異物費日勞力傷財害民有損於德豈如茲瓌既剖既斲斯須速成一材而莫與混并纖微無加而美晔春榮

豆羹賦

一作張翰

乃有孟秋嘉菽垂枝挺莢是刈是穫充簞盈篋香鑠和
調周疾赴急時御一杯下咽三嘆時在下邑頗多艱難
空匱之厄固不綴懽追念昔日啜菽永安

表

上壽食舉歌詩表

太始五年尚書奏使太僕傳玄中書監荀勗
黃門侍郎張華各造正旦行禮及王公上壽
酒食舉樂歌詩華上表勗以魏氏歌詩二三
四五言與古詩不類以問司律中郎將陳頎

曰被之金石未必皆當故最造晉歌皆為四言唯王公上壽酒一篇為三言五言此則華

最所明
異旨也

案魏上壽食舉詩及漢氏所施用其文句長短不齊未
皆合古蓋以依詠弦節本有因循而識樂知音足以制
聲度曲法用率非凡近所能改二代三京襲而不變雖
詩章詞異興廢隨時至其韻逗曲折皆繫於舊有繇然
也是以一皆因就不敢有所改易

薦成公綏表

竊見處士東郡成公綏年二十五字子安體珪璋之資
秉不器之量知深慮明足以妙見研思篤好則仲舒之
精引之闕世貞幹足以敦風篤俗淵才達學足以弘導
世教固逸倫之殊俊搢紳之檢式也

議

封禪議

海內歸心符瑞之應備物之盛未有若今之盛者正宜
禮中嶽封太山禪梁父發德號明至尊厚福慶篤黎民

聞聲自生人則有后辟載化之數莫之能紀大德齊代
揮揚仁風

晉文王謚議

殊位盛禮實隆明德班爵崇寵亦光茂勲至於表名贈
號世考洪烈冠聲無窮者莫尚于號謚也論功高于禹
稷比德邁於伊周

廢黜武悼楊太后議

賈后既誅后父楊駿因宣言太后同逆誣羣
公有司奏太后亦宜廢黜惠帝詔曰此大事

更詳之華為中書監議稱武帝
皇后不從遂廢為庶人弑之

夫婦之道父不能得之於子子不能得之於父皇太后
非得罪於先帝者也今黨其所寵為不母於聖世宜依
漢廢趙太后為孝成后故事貶太后之號還稱武皇后
居異宮以全貴終之恩

黨其所寵后傳作黨
惡所親異宮作離宮

哀策

武帝哀策文

感大饗之無虧哀罇俎之虛設叩龍輔以長叫痛靈暉

之潛逝其辭曰欽惟皇考體道之真德侔乾坤齊曜三
辰應期登禪協於天人上虔郊祀下惠兆民憲章唐虞
允得其津搜揚仄陋故老是賓百揆時序盛業日新恩
從雲翔威猶霆震江海靜波岷嶽無塵四夷率服莫不
來臣肅慎奉貢越裳效珍化此弊俗歸之至淳昔在上
聖咸享百年哀哀皇考用不是臻邁厲彌侵景命殞顛
舍此昭晰即彼幽玄仰瞻靡怙廓若無天終制尚儉率
由典度華幕弗陳器必陶素不封不樹所在惟固貽法

來世是則是慕大隧既啓吉日將征鐘鼓雷震白虎抗
旌龍螭驤首良駟悲鳴倡者振鐸挽夫齊聲背此宗殿
將適下庭玄宮窈窕脩夜冥冥光燈永戢幽閨長扃仰
訴皇穹零淚屏營云誰能忍寄之我情結心墳隴永憑
聖靈

武元楊皇后哀策文

天地配序化成兩儀王假有家道在伉儷姜嫄佐譽二
妃興媯仰希古昔冀亦同規今胡不然景命夙虧嗚呼

哀哉我應圖籙臨統萬方正位於內實在嬪嬙天作之
合駸發其祥河嶽降靈啓祚華陽奕世豐衍朱紉斯煌
纘女惟行受命溥將來翼家邦憲度是常緝熙陰教德
聲顯揚昔我先妣暉曜休光后承前訓奉述遺芳宜嗣
徽音繼序無荒如何不弔背世隕喪瑤齊無主長去蒸
嘗追懷永悼率土摧傷嗚呼哀哉陵兆既窆將遷幽都
宵陳夙駕元妃其徂宮闈遏密階庭空虛設祖布紼告
駕啓途服輦愉狄寄象容車金輅掩藹裳帳不舒千乘

動軫六驥踟蹰銘旌樹表翬柳雲敷祁祁同軌岌岌蒸
徒孰云不懷哀感萬夫寧神虞卜安體玄廬土房陶簋
齊制遂初依行紀謚聲被八區雖背明光亦歸皇姑沒
而不朽世德作謨嗚呼哀哉

誄

章懷皇后誄

自天陶靈必有徵祥誕在初載亦曜神光顯應天祿聿
嬪聖皇受氣自然實聽清和內含茂質外發英華身處

宸極敬恭惟夙窈窕淑媚柔順婉穆宣慈內政流化太
微六宮變雅清我壺闈經綸庶屬積思萬幾既臻緝熙
玄澤流行將翼我后登封降禪氛祲告妖沉結彌留奄
忽升遐棄世高遊聖上哀懷感切悼心率土高素遏密
八音眇眇遊靈將焉所之容光幽邁豈有反期杳杳新
宮下絕三泉茫茫陵域合體中原委棄暉章即安太清

魏劉驃騎誄

昔在殷周惟伊惟呂穆穆公侯紹茲勲緒如何上天殲

我鼎輔金剛玉潤水潔冰清郁郁文彩煥若朝榮功遂
身退致仕懸輿志邈留侯心邁二疎風凜凜以翼衡雲
霏霏以承蓋旒聯翩以飄颻旌繽紛以奄薄

列文先生鮑玄泰誄

於鑠列文續蕤皇祚夏后基命靈根已固杞鄫既微枝
離葉布爰暨叔牙世贊齊風翼桓濟管遽登霸功越在
漢隆三司竝蹤烈考中丞妙世顯名我我先生誕資英
俊淑質清淳蘭芳玉潤抗行崇邈遊心大順允文允明

聰昭秀哲啓冥演幽守文命世抱道冲虛執義貞厲棲
遲無悶不營不忮擬志雲霄致命窮達行為範軌言成
隱括宜登遐年弘此徽猷濟濟縉紳永挹清流取識遺
音日想表儀孰云玄泰曾不我知感傷慷慨揮涕滲澌
已矣鮑子寧爾玄陰振聲竹帛永播徽音

箴

女史箴

惠帝時華懼后族之
盛作女史箴以諷

茫茫造化兩儀始分散氣流形既陶既甄在帝庖犧肇
經天人爰始夫婦以及君臣家道以正而王猷有倫婦
德尚柔含章貞吉婉婉淑慎正位居室樊姬感莊不食
鮮禽衛女矯桓耳忘和音志厲義高而二主易心玄熊
攀檻馮媛趨進夫豈無畏知死不恡班妾有辭割歡同
輦夫豈不懷防微慮遠道固隆而不殺物無盛而不衰
日中則昃月滿則微崇猶塵積替若駭機人咸知飾其
容而莫知飾其性性之不飾或愆禮正斧之漆之克念

作聖出其言善千里應之苟違斯義同衾以疑出言如
微而榮辱由茲勿謂幽昧靈鑒無象勿謂玄漠神聽無
響無矜爾榮天道惡盈無恃爾貴隆隆者墜鑒於小星
戒彼攸遂比心螽斯則繁爾類懼不可以瀆寵不可以
專專實生慢愛極則遷致盈必損理有固然美者自美
翩以取尤冶容求好君子所仇結恩而絕職此之由故
曰翼翼矜矜福所以興靖恭自思榮顯所期女史司箴
敢告庶姬

造化一作元化

大司農箴

家有廬井王有廩籍阜茂豐物和鈞關石在周之室不
虔政首棄稷弗修不籍千畝匱神乏祀敗於戎醜穢臣

司農敢告左右

一本無家有廬井四句

尚書令箴

一刻摯虞

明明先王開國承家作制垂憲仰觀列曜俯令百官政
用罔愆昔舜納大麓七政以齊內成外平而風雨不迷
仲山翼周靡剛靡柔補我袞闕闡我王猷王猷允塞而

四海咸休雖曰聖明必資良材無曰我智官不任能發言如絲其出成綸千里之應樞機在身世李道缺天綱縱替既無老成改舊法制法制不修不長厥裔尚臣司臺敢告侍衛

瓊材枕箴

或或其文馥馥其芬出自幽阻升于氈茵允瓊允麗惟淑惟珍安安文枕貳彼弁冠冠御于畫枕式于昏代作充用榮已寧身興寢有節適性和神

銘

倚几銘

倚几之設設而不倚作器於此成禮於彼

杖銘

不正陷墜不安傾危

書

與褚陶書

陶字季雅吳郡錢塘人清淡閒默以墳典自娛吳平武帝補臺郎建中校尉華為司空與

陶書

二陸龍躍於江漢彥先鳳鳴於朝陽自此以來常恐南金已盡而復得之於吾子故知延州之德不孤淵岱之

寶不匱

世說云張華見褚陶語陸平原曰君兄弟龍躍雲津顧彥先鳳鳴朝陽謂東南之寶已盡不意

復見褚生陸曰公未覩不鳴不躍者耳華曰故知延州之德不孤川嶽之寶不匱矣不云是書

報雷煥書

所致詳觀劔文真干將也莫邪何復不至雖然天生神

物終當合耳

真晉書作乃何復不
至尺牘作可復至否

暫西帖

得書為慰僕諸惛疾已甚暫西卧歸還乃悉比將念反
不具張華呈

問

甲乙問

安豐太守程諒先已有妻後又娶遂立二嫡
前妻亡後妻子勲疑所服中書令張華造甲
乙之問

甲娶乙為妻後又娶景匿不說有乙居家如二嫡無有

貴賤之差乙亡景之子當何服本實並列嫡庶不殊雖
二嫡非正此失在先人人子何得專制折其親也若為
庶母服又不成為庶進退不知所從

序

博物志序

余視山海經及禹貢爾雅說文地志雖曰悉備各有所
不載者作略說出所不見麤言遠方陳山川位象吉凶
有徵諸國境界犬牙相入春秋之後竝相侵伐其土地

不可具詳其山川地澤略而言之正國十二博物之士
覽而鑒焉

贊

博物志地理略贊

地理廣大四海八方遐遠別域略以難詳侯王設險守
國保疆遠遮川塞近備城隍司察姦非禁禦不良勿恃
危阨恣其淫荒無德則敗有德則昌安居猶懼乃可不
亡進用忠良社稷永康教民以孝舜化以彰

樂歌

晉四廟樂歌

王公上壽詩

稱元慶奉聖觴后皇延遐祚安樂撫萬方

食舉東西廂樂詩

明明在上丕顯厥繇翼翼三壽蕃后惟休羣生漸德六合承流三正元辰朝慶鱗萃華夏奉職貢八荒覲殊類
黻冕充廣庭鳴玉盈朝位

其二

濟濟朝位言觀其光儀序既以時禮文煥以彰恩皇享
多祐嘉樂永無央

其三

九賓在庭臚讚既通升瑞奠贄乃侯乃公穆穆天尊隆
禮動容履端承元吉介福御萬邦

其四

朝享上下咸雍崇多儀繁禮容舞盛德歌九功揚芳烈

播休蹤

其五

皇化洽洞幽明懷柔百神輯祥禎潜龍躍彫虎仁儀鳳
鳥屆游麟枯蠹榮竭泉流菌芝茂枳棘柔和氣應休徵
滋協靈符彰帝期綏宇宙萬國和昊天成命賡皇家賡
皇家

其六

世資聖哲三后在天啓鴻烈啓鴻烈隆王基率土謳吟

欣戴於時恒文示象代氣著期

其七

泰始開元龍升在位四隩同風燮寧殊類五躔來備嘉
生以遂凝庶績臻大康申繁祉肩無疆本枝百世繼緒
不忘休有烈光永言配命惟晉之祥

其八

聖明統世篤皇仁廣大配天地順動若陶鈞玄化參自
然至德通神明清風暢八極流澤被無垠

其九

於皇時晉奕世齊聖惟天降嘏神祇保定弘濟區夏允
集大命有命既集光帝猷大明重曜鑒六幽聲教洋溢
惠滂流惠滂流移風俗多士盈朝賢俊比屋敦世心斲
彫反素樸反素樸懷庶方干戚舞階庭疏狄悅遐荒扶
南假重譯肅慎襲衣裳雲覆雨施德洽無疆旁作穆穆
仁化祥

其十

朝元日賓王庭承宸極當盛明衍和樂竭祇誠仰嘉惠
懷德馨遊淳風泳淑清協億兆同歡榮建皇極統天位
運陰陽御六氣殷羣生成性類王道決治功成人倫序
俗化清虔明祀祇三靈崇禮樂式儀刑

其十一

慶元吉宴三朝播金石詠冷簫奏九夏舞雲韶邁德音
流英聲八絃一六合寧六合寧承聖明王澤洽道登隆
綏函夏總華戎齊德教混殊風混殊風康萬國崇夷簡

尚敦德弘王度遠遐則

正旦大會行禮詩

於赫皇祖迪哲齊聖經緯大業基天之命克開洪緒誕
篤天慶旁濟彞倫仰齊七政

其二

烈烈景皇克明克聰靜封略定勲功成民立政儀刑萬
邦式固崇軌光紹前蹤

其三

允文烈考濬哲應期參德天地比功四時大亨以正庶
績咸熙肇啓晉宇遂登皇基

其四

明明我后玄德通神受終正位協應天人容民厚下育
物流仁躋我王道輝光日新

晉冬至初歲小會歌

日月不留四氣迴周節慶代序萬國同一作咸休庶尹羣

后奉壽一作壽升朝我有嘉禮式宴百僚繁肴綺錯旨酒

泉淙笙鏞和奏磬管流聲上隆其愛下盡其心宣其壅

滯訓

一作詠

之德音乃宣乃訓配享交泰永戴仁風長撫

無外

晉宴會歌

疊疊我皇配天垂光留精日昃經覽無方聽朝有暇延
命衆臣冠蓋雲集罇俎星陳肴蒸多品八珍代變羽爵
無筭究樂極宴歌者流聲舞者投袂動容有節絲竹竝
設宣暢四體繁手趣摯懽足發和酣不忘禮好樂無荒

翼翼濟濟

晉中宮所歌

先王統大業玄化漸八維儀刑乎萬邦內訓隆壺闈皇

英垂帝典大雅詠三妃執德宣隆教正位理厥機一作司

含章體柔順率禮蹈謙祗螽斯弘慈惠樛木逮幽微徽

音穆清風高義邈不追遺榮參日月百世仰餘暉

晉宗親會歌

族燕明禮順餽食序親親骨肉散不殊昆弟豈他人本

枝篤同慶棠棣著先民於皇聖明后天覆弘且仁降禮
崇親戚旁施協族姻式宴盡酣娛飲御備羞珍和樂既
宣洽上下同歡欣德教加四海敦睦被無垠

晉正德大豫舞歌

正德舞歌

曰皇上天玄鑒惟光神器周回五德代章祚命于晉世
有哲王弘濟區夏陶甄萬方大明垂耀旁燭無疆蚩蚩
庶類風德永康皇道惟清禮樂斯經金石在縣萬舞在

庭象容表慶協律被聲軼武超濩取節六英同進退讓
化漸無形太和宣洽通于幽冥

大豫舞歌

維天之命符運有歸赫赫大晉三后重暉繼明紹世光
撫九圍我皇紹期遂在璇璣羣生屬命奄有庶邦慎徽
五典立教遐通萬方同軌率土咸雍爰制大豫宣德舞
功醇化既穆王道協隆仁及草木惠加昆蟲億兆夷人
悅仰皇風丕顯大業永世彌崇

晉凱歌

命將出征歌

重華隆帝道戎蠻或不賓徐夷興有周鬼方亦違殷今
在聖明世寇虐動四垠豺狼染牙爪羣生號穹旻元帥
統方夏出車撫涼秦衆貞必以律臧否實在人威信加
殊類疎逖思自親單醪一作無豈有一作無味挾纊感至仁武功
尚止戈七德美安民遠跡由斯舉永世無風塵

勞還師歌

猘狁背天德，構亂擾邦畿。戎車震朔野，羣帥贊皇威。將士齊心旅，感義忘其私。勢積如鄴弩，赴節如發機。鷙聲動山谷，金光曜素暉。揮戟晉書作戈陵勁敵，武步蹈橫屍。鯨鯢皆授首，北土永清夷。昔往冒隆暑，今來白雪霏。征夫信勤瘁，自古詠采薇。收榮於舍爵，燕喜在凱歸。

晉白紵舞歌詩

輕軀徐起，何洋洋。高舉兩手，白鵠翔。宛若龍轉，乍低昂。凝停善睐，容儀光如推。若引留，且行隨。世而變，誠無方。

舞以盡神安可忘晉世方昌樂未央質如輕雲色如銀
愛之遺誰贈佳人制以為袍餘作巾袍以光軀巾拂塵
麗服在御會佳賓醪醴盈樽美且淳清歌徐舞降祇神
四座歡樂胡可陳

其二

雙袂齊舉鸞鳳翔羅裙飄颻昭儀光趨步生姿進流芳
鳴弦清歌及三陽人生世間如電過樂時每少苦日多
幸及良辰耀春華齊倡獻舞趙女歌羲和馳景逝不停

春露未晞嚴霜零百草凋索花落英蟋蟀吟牖寒蟬鳴
百年之命忽若傾早知迅速秉燭行東造扶桑遊紫庭
西至崑崙戲曾城

其三

陽春白日風花香趨步明玉舞瑤璫聲發金石媚笙簧
羅袿徐轉紅袖揚清歌流響繞鳳梁如矜若思凝且翔
轉眄遺精豔輝光將流將引雙鴈行歡來何晚意何長
明君御世永歌昌

晉杯槃舞歌詩

晉世寧四海平普天安樂永大寧四海安天下歡樂治
興隆舞杯槃舞杯槃何翩翩舉坐翻覆壽萬年天與日
終與一左回右轉不相失箏笛悲酒舞疲心中慷慨可
健兒樽酒甘絲竹清願令諸君醉復醒醉復醒時合同
四座歡樂皆言工絲竹音可不聽亦舞此槃左右輕自
相當合坐歡樂人命長人命長當結友千秋萬歲皆老
壽

拂舞歌三首

白鳩篇

翩翩白鳩載飛載鳴懷我君德來集君庭白雀呈瑞素

羽明鮮翔庭舞翼以應仁乾交交

晉書作皎皎

鳴鳩或丹或

黃樂我君惠振羽來翔東壁餘光魚在江湖惠而不費

敬我微軀策我良駟習我驅馳與君周旋樂道亡餘

晉書

作忘

我心虛靜我志霑濡彈琴鼓瑟聊以自娛凌雲登

臺浮游太清扳龍附鳳目

晉書作自來書作目

望身輕

獨漉篇

獨漉獨漉

晉書作獨
獨祿祿

水深泥濁泥濁尚可水深殺我雍

雍雙鴈遊戲田畔我欲射鴈念子孤散翩翩浮萍得風

搖

宋書
作遙

輕我心何合與之同并空牀低帷誰知無人夜

衣錦繡誰別偽真刀鳴箭中倚牀無施父冤不報欲活
何為猛虎斑斑遊戲山間虎欲齧人不避豪賢

濟濟篇

暢飛暢舞

晉書作暢
暢飛舞

氣流芳追念三五大綺黃去失有

時可行去來同時

晉作去來時同

此未央時冉冉近桑榆但當

飲酒為歡娛衰老逝有何期

晉作何有期

多憂耿耿內懷思

淵池廣

晉作曠

魚獨希願得黃浦衆所依恩感人世無比

悲歌且舞無極已

詩

遊獵篇

歲暮凝霜結堅冰
泓幽泉厲風蕩原隰
浮雲蔽昊天玄
雲晦
歟合素雪紛連
翩鷹隼始擊
鷙虞人獻時
鮮嚴駕

鳴儔侶攬轡過中田戎車方四牡文軒馭紫燕興徒既
整飭容服麗且妍武騎列重圍前驅抗脩旃倏忽似回
飈絡繹若浮烟鼓噪山淵動衝塵雲霧連輕矰拂素電
織網蔭長川游魚未暇竄歸鴈不得還

一作旋

由基控繁

弱公差操黃間機發應弦倒一縱連雙肩僵禽正狼藉
落羽何翻翻積獲被山阜流血丹中原馳騁未及勦曜
靈俄移晷結罟彌數澤囂聲振四鄙鳥驚觸白刃獸駭
掛流矢仰手接遊鴻舉足蹴犀兕茹黃批狡兔青骹撮

飛雉鵠鷺不盡收鳬鷺安足視日冥徒御勞賞勤課能
否野饗會衆賓玄酒甘且旨燔炙播遺芳金觴浮素蟻
珍羞陞歸雲纖看出淥水四氣運不停年時何疊疊人
生忽如寄居世遽能幾至人同禍福達士等生死榮辱
渾一門安知惡與美遊放使心狂覆車難再履伯陽為
我誠檢跡投清軌

遊俠篇

翩翩四公子濁世稱賢名龍虎相交爭七國並抗衡食

客三千餘門下多豪英遊說朝夕至辯士自縱橫孟嘗

東出關濟身由鷄鳴信陵西反魏秦人不窺兵

藝文類聚作關

濟趙勝南詛楚乃與毛遂行黃歇北適秦太子還入荆

美哉遊俠士何以尚四卿我則異於是好古師老彭

博陵王宮俠曲

俠客樂幽險築室窮山陰燎獵野獸稀施網川無禽歲
暮飢寒至慷慨頓足吟窮令壯士激安能懷苦心干將
坐自閑繁弱控餘音耕田窮淵陂種粟著劍鐔收秋狹

路間一擊重千金棲遲熊羆穴容與虎豹林身在法令
外縱逸常不禁

其二

雄兒任氣俠聲蓋少年場借友行報怨殺人租市旁吳
刀鳴手中利劍嚴秋霜腰間叉素戟手持白頭鏤騰超
如激電迴旋如流光奮擊當手決交屍自縱橫寧為殤
鬼雄義不入圍牆生從命子遊死聞俠骨香身沒心不
懲勇氣加四方

門有車馬客行

門有車馬客問君何鄉士捷步往相訊果是舊鄰里語
昔有故悲論今無新喜清晨相訪慰日暮不能已詞端
競未究忽唱分途始前悲尚未弭後憂方復起

輕薄篇

末世多輕薄驕代

一作或

好浮華志意既

一作能

放逸貲財

亦豐奢被服極纖麗有膳盡柔嘉重僕餘梁肉婢妾蹈綾
羅文軒樹羽蓋乘馬鳴玉珂橫簪刺玳瑁長鞭錯象牙

足下金鑄履手中雙
莫耶賓從煥絡繹
侍御何芬葩
朝與金張期暮宿許史家
甲第面長街朱門赫差莪
蒼梧竹葉清宜城九醞醴
浮醪隨觴轉素蟻自跳波
美女興齊趙妍唱出西巴
一顧城國傾千金寧

樂府作不

足多北里

獻奇舞大陵奏名歌
新聲踰激楚妙伎絕陽阿
元鶴降浮雲鰾魚躍中河
墨翟且停車展季猶咨嗟
淳于前行酒雍門坐相和
孟公結重關賓客不得蹉
三雅來何遲耳熱眼中花
盤案互交錯坐席咸誼譁
簪珥咸墮落冠

晷皆傾邪酣飲終日夜明燈繼朝霞絕纓尚不尤安能
復顧他留連彌信宿此歡難可過人生若浮寄年時忽
蹉跎促促朝露期榮樂遽幾何念此腸中悲涕下自滂
沱但畏執法吏禮防且切磋

壯士篇

天地相震蕩回薄不知一作可窮人物稟常格有始必有
終年時俛仰過功名宜速崇壯士懷憤激安能守虛沖
乘我大宛馬撫我繁弱弓長劍橫九野高冠拂玄穹慷慨

慨成素霓嘯叱起清風震響駭八荒奮威耀四戎濯鱗
滄海畔馳騁大漠中獨步聖明世四海稱英雄

蕭史曲

蕭史愛長

一作少

年羸女吝童顏火粒願排棄霞霧好登

攀龍飛逸

一作竟

天路鳳起出秦關身去長不返簫聲時

往還

祖道征西應詔詩

赫赫大晉奄有萬方陶以仁化曜以天光貳跡陝西寶

在我王內飪玉鉉外惟鷹揚四牡揚鑣玄輅振綏庶寮
羣后餞飲洛湄感離歎悽慕德遲遲

祖道趙王應詔詩

崇選穆穆利建明德

一作明明

於顯穆親時惟我王稟姿自

然金質玉相光宅舊趙作鎮冀方休寵曲錫備物煥彰
發軔上京出自天邑百寮餞行縉紳具集軒冕我我冠
蓋習習戀德惟懷永歎弗及

太康六年三月三日後園會詩

暮春元日陽氣清明祁祁甘雨膏澤流盈習習祥風啓
滯導生禽鳥翔逸一作逸豫卉木一作桑麻滋榮纖條被綠翠華
含英

其二

於皇我后欽若昊乾順時省物言觀中園讌及羣辟乃
命乃延一作初筵合樂華池被濯清川汎彼一作汎汎龍舟汧游
洪源藝文作汧
渚游源

其三

朱幕雲覆列坐丈茵羽觴波騰品物備珍管絃繁會變
用奏新穆穆我皇臨下渥仁訓以慈惠詢納廣神好樂
無荒化達無垠

其四

咨予微臣荷寵明時忝恩於外攸攸三期犬馬惟慕天
實為之靈啓其願邀願在茲於以表情爰著斯詩

上巳篇

仁風導和氣句芒御昊春姑洗應時月元已啓良辰密

雲陰朝日零雨灑微塵飛軒遊九野置酒會衆賓臨川
懸廣幕夾水布長茵徘徊存往古慷慨慕先真朋從自
遠至童冠八九人追好舞穹庭擬跡洙泗濱伶人理新
樂膳夫然時珍八音礪礪奏肴俎從橫陳妙舞起齊趙
悲歌出三秦春醴踰九醞冬清過十旬盛時不努力歲
暮將何因勉哉衆君子茂德景日新高飛舞鳳翼輕舉
攀龍鱗

勵志詩

大儀幹

鳥枯反

運天迴地游四氣鱗次寒暑環周星火既

夕忽焉素秋涼風振落熠燿宵流

其二

吉士思秋實感物化日與月與

平聲

荏苒代謝逝者如斯

曾無日夜嗟爾庶士胡寧自舍

其三

仁道不遐德輶如羽求馬斯至衆鮮克舉大猷玄漠將

抽厥緒先民有作貽我高矩

其四

雖有淑姿放心縱逸出般於游居多暇日如彼梓材弗
勤丹漆雖勞樸斲終負素質

其五

養由矯矢獸號於林蒲蘆紫繳神感飛禽末伎之妙動
物應心研精軌道安有幽深

其六

安心恬蕩棲志浮雲體之以質彪之以文如彼南畝力

未既勤蔗蓑致功必有豐殷

其七

水積成川載瀾載清土積成山歆蒸鬱冥山不讓塵川

不辭盈勉爾

一作志

含弘以隆德聲

其八

高以下基洪由纖起川廣自源成人在始累微以著乃
物之理經牽之長實累千里

其九

復禮終朝天下歸仁若金受礪若泥在鈞進德修業輝
光日新隰朋仰慕予亦何人

答何劭

吏道何其迫窘然坐自拘纓綬為徽纆文憲焉可踰恬
曠苦不足煩促每有餘良朋貽新詩示我以游娛穆如
灑清風煥若春華敷自昔同寮寀於今比園廬衰疾近
辱殆庶幾並懸輿散髮重陰下抱杖臨清渠屬耳聽鷺
鳴流目翫儵魚從容養餘日取樂於桑榆

其二

洪鈞陶萬類大塊稟羣生明闇信異姿靜躁亦殊形自
予及有識志不在功名虛恬竊所好文學少所經泰荷
既過任白日已西傾道長苦智短責重困才輕周任有
遺規其言明且清負乘為我戒夕惕坐自驚是用感嘉
貺寫心中誠發篇雖溫麗無乃違其情

其三

駕言歸外庭放志永棲遲相伴步園疇春草鬱鬱滋榮

觀雖盈目親友莫與偕
悟物增隆思結戀慕同儕
援翰屬新詩永歎有餘懷

情詩

清風動簾帷晨月照

五臣作燭

幽房佳人處遐遠
蘭室無容

光襟懷擁虛景輕衾覆空牀
居歡惜夜促在戚怨宵長
拊五臣作撫枕獨嘯歎感慨心內傷

其二

游目四野外逍遙獨延佇
蘭蕙緣清渠繁華陰綠渚
佳

人不在茲取此欲誰與巢居知風寒穴處識陰雨不曾
遠別離安知慕儔侶

其三

北方有佳人端坐鼓鳴琴終晨撫管絃日夕不成音憂
來結不解我思存所欽君子尋時役幽妾懷苦心初為
三載別於今久滯淫昔耶生戶牖庭內自成陰翔鳥鳴
翠偶草蟲相和吟心悲易感激俛仰淚流衿願託晨風
翼東帶侍衣衾

其四

明月曜清景，曦光照玄墀。幽人守靜夜，迴身入空帷。東帶俟將朝，廓落晨星稀。寤假交情興，覲我佳人姿。巧笑媚懽一作謹，靨聯媚眸與眉。寤言增長歎，淒然心獨悲。

其五

君居北海陽，妾在江南陰。懸邈極脩途一作脩途遠，山川阻且深。承懽注隆愛，結分投所欽。銜恩一作思，篤守義萬里。

託微心

感婚詩

駕言遊東邑東邑紛攘攘婚姻及良時嫁娶避當梁窈窕出閨女嫵婉姬與姜素顏發紅華美目流清揚韓煒衆親盛於我猶若常譬彼暮春草榮華不再陽

雜詩

晷度隨天運四時互相承東壁正昏中涸陰寒節升繁霜降當夕悲風中夜興朱火青無光蘭膏坐自凝重衾無暖氣挾纊如懷冰伏枕終遙夕寤言莫予應永思慮

崇替慨然獨拊膺

其二

逍遙游春空

一作宮

容與淶池阿白蘋開素葉朱草茂丹

華微風搖蔭若增波動芰荷榮彩曜中林流馨入綺羅
王孫遊不歸脩路邈以遐誰與翫遺芳佇立獨咨嗟

其三

荏苒日月運寒暑忽流易同好逝不存迢迢遠離析房
攏自來風戶庭無行迹蒹葭生牀下蛛蝥網四壁懷思

金一八八
卷四十
豈不隆感物重鬱積遊鴈比翼翔歸鴻知接翮來哉彼
君子無愁徒自隔

擬古

松生壠坂上百尺下無枝東南望河尾西北隱崑崖剛
風振山籟朋鳥夜驚離悲涼貫年節葱翠恒若斯安得
草木心不怨寒暑移

遊仙詩

雲霓垂藻旒羽袿揚輕裾飄登青雲間論道神皇廬蕭

史登鳳音王后吹鳴竽守精味玄妙逍遙無為墟

其二

玉佩連浮星輕冠結朝霞列坐王母堂艷體飡瑤華湘
妃詠涉江漢女奏陽阿

其三

乘雲去中夏隨風濟江湘疊疊陟高陵遂升玉巒陽雲
娥薦瓊石神妃侍衣裳

贈摯仲洽詩

君子有逸志棲遲於一丘仰蔭高林茂俯臨淥水流恬
淡養玄虛沈精研聖猷

招隱

隱士託山林遁世以保真連惠亮未遇雄才屈不伸

其二

棲遲四野外陸沈背當時循名掩不著藏器待無期羲
和策六龍弭節越崦嵫盛年俛仰過忽若振輕絲

荷詩

荷生綠泉中碧葉齊如規迴蕩流霧珠暎水逐條垂照
灼此金塘藻耀君王池不愁世嘗絕但畏盛明移

橘詩

橘生湘水側菲陋人莫傳逢君金華宴得在玉几前

漢魏六朝百三家集卷四十

欽定四庫全書

漢魏六朝百三家集卷四十一

晉孫楚集題詞

子荆零雨正長朔風稱於詩家今亦未見其絕
倫也除婦服詩王武子嘆為情文相生然以方
嵇君道伉儷詩兄弟間耳江東未順司馬文王
發使遣書子荆與荀公曾各奮筆札孫最傑出
而荀獨見用謂勝十萬師文章有神不在遇合

朝廟之上賞音尤難必欲如元瑜孔璋見知孟
德豈易言哉石驃騎府主也郭奕其同里也睥
睨忿爭遂致沉廢子荆平日素有傲名鄉曲缺
譽此亦其見短之一事乎然同閑相知有一武
子生死願足靈牀驢聲何必非叔夜之琴也笑
賦調謔自得反金人銘蚩薄箝口似狂非狂言
各有寄若夫長虞勁直箋頌夜光威輦被髮遺
書勸仕知人實長未聞玩物太原名士磊落英

多其為品狀寧讓汝賴哉

目錄

賦

笑賦

登樓賦

同前

韓王臺賦

有序

又

井賦

雪賦

茄賦

有序

相風賦

菊花賦

蓮花賦

杖杜賦

有序

茱萸賦

鷹賦有序

鴈賦

雉賦

蟬賦

論

屈建論

頌

尼父頌

梁令孫侯頌

贊

莊周贊

榮啓期贊

原壤贊

顏回贊

管仲贊

季子贊

白起贊

樂毅贊

韓信贊

銘

反金人銘

石人銘

碑

故太傅羊祜碑

鴈門太守牽府君碑

疏

龍見上疏

九品疏

取士疏

牋

薦傅長虞牋

謝賜鄣日牋

書

為石苞與孫皓書

與董京書

哀文

和氏外孫道生哀文

和氏外孫小同哀文

詩

答弘農故吏民

除婦服詩

征西官屬送於陟陽侯作詩

太僕座上詩

祖道詩

之馮翊祖道詩

漢魏六朝百三家集卷四十一目錄

欽定四庫全書

漢魏六朝百三家集卷四十一

明 張溥 輯

晉孫楚集

賦

笑賦

有度俗之公子總萬物之細故心髮髴乎巢由以得意
為至樂不拘戀乎凡流會親戚於高宇結宗盟於綢繆

所以交頸偃仰椎膺指掌亢洪聲於通谷順長風以流
響氣參譚以相屬若將頽而復往或頓蹠俛首狀似悲
愁怫鬱唯轉呻吟郁伊或攜手悲嘯噓天長叫達重則
如陸沈輕疾則如水漂徐疾任其口頰圓合得乎機要
或中路背叛更相毀賤傾倚匡我彫聲迄乎日晏信天
下之笑林調謔之巨觀也

登樓賦

有都城之百雉加層樓之五尋從明王以登極聊暇日

以娛心涇渭汨以阻邁卉木鬱而成林晞朝陽之素暉
羨綠竹之茂陰望秦墳於驪山覩八陵於北岑營巷基
峙列宅萬區黎民布野商旅充衢杞柳綢繆芙蓉吐芳
俯依清川仰翳朱陽體象濛汜幽若扶桑白日為之晝
昏鳥禽為之頡頏

同前

有都城之百雉加層樓之五尋從明王之登遊聊暇日
以娛心鳴鳩拂羽於桑榆游鳬濯翅於素波牧豎吟嘯

於行陌舟人鼓枻而揚歌百僚雲集促坐華臺嘉肴滿
俎旨酒盈杯談三墳而詠五典釋聖哲之所裁

具載藝文首同

四句而未互
異姑兩存之

韓王臺賦

有序

酸棗寺門外夾道左右有兩故臺訪諸故老云韓王聽
訟觀也

望韓王之故臺尋往代之所營雙闕碣以峻峙貫雲氣
而上征歷千載而特立顯妙觀於太清薄邯鄲之叢臺

陋楚國之章華邈宕堯以亢極豈岑樓之能加至乃宮
觀弘敞層臺隱天伐丈梓於萬仞發玉石於三泉優倡
角鳥鳥之聲蛾眉戲白雲之舞紛淫衍以低卽翳脩袖
而容與

又

葢丘陵之邈迤亞五嶽之嵯峩

井賦

倚崇丘以鑿井兮臨斥澤之淫洿若行潦之滓濁兮靡

清流以自娛乃喟爾而有感兮率鄰左之數夫脉脉土
以興泉兮登甘醴於玄虛體象圓川下貫五仞幽泉勝
涌津澤傍潤抱甕而汲不設機引絕彼淫飾安此樸慎
俗尚其華我篤其信既處湮而不緇又磨之而不磷雖
矢志而無妄實游心於大順渴人來翔行旅是賴輟耕
息肩不期而會沈黃李浮朱柰雜狸首之斑如飛清塵
以洮汰枕玄石以盥漱喜遨怡以緩帶

雪賦

充九載以山栖兮湯請禱於桑林罔二聖以濟世兮孰
繁衍以迄今嗟亢陽之踰時兮情反側以寢興豐隆灑
雪交錯翻紛膏澤偃液普潤中田肅肅三麥實獲豐年

笳賦

有序

頃還北館遇華髮人於潤水之濱向春風而吹長笳音
聲寥亮有感余情爰作斯賦

銜長葭以泛吹噉啾啾之哀聲奏胡馬之悲思詠北狄
之遐征順谷風以撫節飄逸響乎天庭爾乃調脣吻整

容止揚清臚隱皓齒徐疾從宜音引代起叩角動商鳴
羽發徵若夫廣陵散唌三節白紵太山長曲哀及梁父
似鴻雁之將雛乃羣翔於河渚

相風賦

伊聖皇之高烈美治道之穆清兼乾坤之普覆齊三光
之朗明猶恭已以勞謙迄日昃而不寧慮聽政之有闕
誠禍福於無形建殊才於辰極樹相風於紫庭爾乃神
獸盤其根靈鳥據其顛羽族翩飄羅其側翔風蕭聊出

其間

菊花賦

彼芳菊之為草兮稟自然之醇精當青春而潛翳兮迄
素秋而敷榮於是和樂公子雍容無為翩翩華林駿足
交馳薄言采之手折纖枝飛金英以浮旨酒拂翠葉以
振羽儀偉茲物之珍麗兮超庶類而神奇

蓮花賦

有自然之麗草育靈沼之清瀨結根係於重壤森萼延

以騰邁爾乃紅花電發暉光烜烜仰曜朝霞俯照綠水
潛綳房之奧密兮含珍藕之甘腴攢聚星列纖離相扶
微若玄黎披幽夜粲若鄧林飛鵷雛

杜杜賦有序

家弟以虞氏梨賦見示余謂豈以梨有用之為貴杜無
用之為賤故無用獲全所以為貴有用獲殘所以為賤
故賦云爾

惟有秋之為杜齊萬物而並生其實菲薄既不施於器

用華葉疎悴靡休陰之茂榮昔在邵伯聽訟述職甘棠
作頌垂之罔極

茱萸賦

有茱萸之嘉木植茅茨之前庭歷漢女而始育閱百載
而長生森蔓延以盛興布綠葉於紫莖鶉火西徂白藏
授節零露既凝鷹隼飄厲攀紫房於纖柯綴朱實之醕
烈應神農之本草療生民之疹疾

鷹賦

有序

郭延考與余厚其從者韞二鷹以侍側郭邊人也好弋獵顧盼心欲自娛樂請余為賦曰

有金剛之俊鳥生井陘之巖阻超萬仞之崇嶺蔭青松以靜處體勁悍之自然振肅肅之輕羽擒狡兔於平原截鴻鴈於河渚且其為相也疏尾濶臆高髻禿顙深目蛾眉狀似愁胡曲觜短頸足若雙枯麾則應機招則易呼背碣石以西遊經馬嶺而南徂于時商秋既邁歲在玄冥風霜激厲羽毛振驚爾乃策良驥服羔裘韞青骹

戲田疇縈深谷繞山丘定心意審精眸獸馳厥足鳥矯
其翼下赴幽谿上翔辰極隨指授以騰踴因升降以畢
力紛連薄以攬竄遂陷首以摧臆

鴈賦

有逸豫之雋禽稟和氣之清沖候天時以動靜隨寒暑
而污隆颺同集于曠野紛羣翔於雲中翳朝陽之景曜
角聲勢於晨風族類阜繁數則千億迎素秋而南遊背
青春而北息泝長川以鳴號凌洪波以鼓翼任自然而

相羊窮天壤於八極

雉賦

體冲和之淑質飾羽儀於茂林斑五色之文章揚皦皦之清音設密網於巖阿飛輕繳之雲浮上無逃而弗獲下無隱而不搜遂戢翼以就養隨籠棲而言歸恒逍遙於階庭廕朝陽之盛暉

蟬賦

惟大化之廣御何品數之多名當仲夏之始出據長條

而悲鳴翼如羅纏形如枯槁終日不銜一粒激哀響之
煩擾

論

屈建論

加蓮之品菱芰存焉楚多陂塘菱芰所生父自嗜之而
抑按宰祝既毀就養無方之禮又失奉死如生之義奪
平素欲建何忍焉

頌

尼父頌

皇矣尼父聖哲之傑德比天地明齊日月周室陵遲大道蕪穢禮樂崩阻姦雄罔世乃養門徒廣延俊乂垂訓列國頌聲魯衛威震夾谷義厭陳蔡德之休明幽而彌泰超美三代風馳雲邁

梁令孫侯頌

於穆君侯英才宣朗神鑒將來思通既往受佐陝西臨我邦壤聲之所振下應如響明斷決疑易於指掌野有

寇盜惟侯屏之我有田疇惟侯闢之古人慎獄惟侯平之凡此三惠如何勿思

贊

莊周贊

莊周曠蕩高才英雋本道根貞歸於大順妻亡不哭亦何所懼慢弔鼓缶放此誕言始矯其情近失自然

榮啟期贊

榮公溫雅既怡既懌濁以徐清寂然澹泊援琴自娛詠

此三樂眉壽無疆惟德之宅

原壤贊

壤之輒張絕滅禮教實交仲尼同機合與聖以之藏俗
以之笑獨恊區外孰知其妙

顏回贊

束身勵行宗事聖道鑽仰孜孜視予猶考

管仲贊

管生彎弓與桓是讐駿奔從糾塊為纍囚沐浴西郊鸞

飛簷丘

季子贊

季子聰哲思心精微玄覽幽寤觸類應機

白起贊

烈烈桓桓時唯武安神機電斷氣濟師然南折勁楚走
魏禽韓北摧馬服凌川成丹應侯無良蘇子入關噉噉
讒口火燎于原遂焚杜郵與蕭俱燔惟其歿矣古今所
歎

樂毅贊

樂生誕節實立弘度丹旄電麾秦韓景附威震濟西齊
愍失據惠之不敏翻然高翔棲遲一丘以保皓素

韓信贊

淮陰屈節盤於幽賤秦失其鹿英雄交戰踐楚知亡撫
戈從漢遂寤明主超然虎奮威震趙魏擒項平難割據
山川稱孤南面惜哉邁疑一朝書叛

銘

反金人銘

晉太廟有石人焉大張其口而書其胷曰我古之多言人也無少言無少事少言少事則後生何述焉夫唯立言名乃長久胡為塊然生鉗其口凡夫貪財烈士殉名盜跖為濁夷柳為清鮑肆為臭蘭圃為馨莫貴澄清莫賤滓穢二者言異歸於一會充懸諫鼓舜立謗木聽采風謠惟日不足道潤羣生化隆比屋末葉陵遲禮教彌衰承旨則順忤意則違時好細腰宮中皆飢時悅廣額

下作細眉逆龍之鱗必陷斯機括囊無咎乃免誅夷顛
覆厥德可為傷悲期可用戒無妄之時假說周廟於言
為蚩是以君子追而改之

石人銘

大象無形元氣為母杳兮冥兮陶冶衆有

碑

故太傅羊祜碑

稟二儀之純靈膺造化之冲氣文為辭宗行作世表遷

黃門侍郎受祕書監公筭滅吳之略以為孟獻營虎牢而鄭人懼晏弱城東陽而萊子服乃進據險處開建五城收膏腴之地奪敵人之資於是江浦馳義極負而至雖研精軍政用思滅敵然兼立學校闡揚典訓是以縉紳之士鱗集仰化雲翔衡門雖泮宮之詠魯侯菁莪之美育才無以過也銘曰

金德發曜惟公作輔肇造嘉謨建我明主不愆遺公俾屏聖皇哲人其徂孰不增傷

鴈門太守牽府君碑

君體德允直才量高潔明鑒達於世變弘毅足以致遠
聿振鴻翼於袞塵之表卓爾先覺於擬議之前君與劉
備少長河朔英雄同契為刎頸之交俄而委質於太祖
備遂鼎足於蜀漢所交非常為時所忌每自酌損在乎
季孟之間遷鴈門太守教民耕戰聽斷以情信賞必罰
下服其命是以夷狄窘迫罔知所安譬秋枯之隕晨風
激雷之不及掩耳也伐叛柔服威震沙漠遺種遠迹萬

里無煙

烈烈君侯文武允崇少兼七德翰飛撫戎名揚河朔威
鎮漢中臨危運奇在難匪從迴旌東麾撫司徐青截彼
降賊海岱以平剖符千里為國干城

疏

龍見上疏

頃聞武庫井中有二龍羣臣或有謂之禎祥而稱賀者
或有謂之非祥無所賀者可謂楚既失之而齊亦未為

得也夫龍或俯鱗潛于重泉或仰攀雲漢游乎蒼昊而
今蟠于坎井同於蛙蝦者豈獨管庫之士或有隱伏厠
役之賢沒於行伍故龍見光景有所感悟願陛下赦小
過舉賢才垂夢於傅巖望想於渭濱修學官起淹滯申
命公卿舉獨行君子可惇風厲俗者又舉亮拔秀異之
才可以撥煩理難矯世抗言者無繫世族必先逸賤夫
戰勝攻取之勢并兼混一之威五伯之事韓白之功耳
至於制禮作樂闡揚道化甫是士人出筋力之秋也伏

願陛下擇狂夫之言。

九品疏

九品漢氏本無班固著漢書序先往代賢智以九條此
蓋記鬼錄次第耳而陳羣依之以品生人又魏武拔奇
決於胸臆收人才不問階次豈賴九品而後得人今可
令長守為小大中正各自品其編戶也

取士疏

當今士子繁多畧以萬計當患官少才多無地以處秀才

自別是一種仕官非若漢代取人之例也假若秀才對
五問可稱孝廉答一策能通此乃雕蟲小道何關理功
得人以此求才徒虛語爾

牋

薦傅長虞牋

楚聞騏驎不遺能於伯樂良寶不藏輝於卞和是以輝
光夜射價連秦趙飛駟絕影終朝千里物尚有之士亦
宜然

謝賜鄣日牋

大恩賜鄣日其器雖小而禮遇甚弘昔衛綰錫六劍珍而不用楚雖不敏且受而藏之

書

為石苞與孫皓書

蓋聞見機而作周易所貴小不事大春秋所誅此乃吉凶之萌兆榮辱之所由生也是故許鄭以銜璧全國曹譚以無禮取滅載籍既記其成敗古今又著其愚智矣

不復廣引譬類崇飾浮辭苟以夸大為名更喪忠告之
實今粗論事勢以相覺悟昔炎精幽昧歷數將終桓靈
失德災釁並興豺狼抗爪牙之毒生人陷塗炭之艱於
是九州絕貫皇綱解紐四海蕭條非復漢有太祖承運
神武應期征討暴亂克寧區夏協建靈符天命既集遂
廓洪基奄有魏域土則神州中嶽器則九鼎猶存世載
淑美重光相襲固知四隩之攸同帝者之壯觀也公孫
淵承藉父兄世居東裔擁帶燕胡憑陵險遠講武盤桓

不供職貢內傲帝命外通南國乘桴滄海交酬貨賄葛
越布於朔土貂馬延乎吳會自以為控弦十萬奔走足
用信能右折燕齊左振扶桑陵轢沙漠南面稱王也宣
王薄伐猛銳長驅師次遼陽而城池不守桴鼓一震而
元兇折首然後遠跡疆場列郡大荒收離聚散咸安其
居民庶悅服殊俗款附自茲以降九野清泰東夷獻其
樂器肅慎貢其楛矢曠世不羈應化而至魏魏蕩蕩想
所具聞吳之先祖起自荊州遭時擾攘潛播江表劉備

震懼亦逃巴岷遂依丘陵積石之固三江五湖浩汗無
涯假氣游魂迄于四紀二邦合從東西唱和互相扇動
距捍中國自謂三分鼎足之勢可與泰山共相終始相
國晉王輔相帝室文武桓桓志厲秋霜廟勝之算應變
無窮獨見之鑒與衆絕慮主上欽明委以萬機長轡遠
御妙略潛授偏師同心上下用力陵威奮伐采入其阻
并敵一向奪其膽氣小戰江介則成成都自潰曜兵劍閣
而姜維面縛開地五千列郡三十師不踰時梁益肅清

使竊號之雄稽顙絳闕球琳重錦充於府庫夫韓并魏
徙號滅虞亡此皆前鑒之驗後事之師也又南中呂興
深覩天命蟬蛻內向願為臣妾外失輔車唇齒之援內
有毛羽零落之漸而裴回危國冀延日月此猶魏武侯
却指河山以自彊大殊不知物有興亡則所美非其地
也方今百僚濟濟雋乂盈朝虎臣武將折衝萬里國富
兵彊六軍精練思復翰蜚飲馬南海自頃國家整修器
械興造舟楫簡習水戰伐樹北山則太行木盡濬決河

洛則百川通流樓船萬艘千里相望自創木以來舟車之用未有如今之盛者也驍勇百萬畜力待時役不再舉今日之謂也然主上眷眷未便電發者以為愛民治國道家所尚崇城遂卑文王退舍故先開示大信喻以存亡殷勤之旨往使所究若能審識安危自求多福蹶然改容祇承往錫追慕南越嬰齊入侍北面稱臣伏聽告策則世祚江表永為藩輔豐報顯賞隆於今日矣若有侮慢不式王命然後謀力雲合指麾風從雍益二州順

流而東青徐戰士列江而西荆揚兗豫爭馳八衝征東
甲卒虎步秣陵爾乃皇輿整駕六師徐征羽校燭日旌
旗流星游龍曜路歌吹盈耳士卒奔邁其會如林煙塵
俱起震天駭地渴賞之士鋒鏑爭先忽然一旦身首橫
分宗祀屠覆取誠萬世引領南望良以寒心夫治膏肓
者必進苦口之藥決狐疑者必告逆耳之言如其迷謬
未知所投恐俞跗見其已困扁鵲知其無功也勉思良
圖惟所去就

與董京書

京與隴西計吏俱至洛陽被髮而行逍遙吟
咏嘗宿白社中時乞於市孫楚數就社中與
京語載以供歸京不肯
至楚貽之書京答以詩

今堯舜之世胡為懷道迷邦

哀文

和氏外孫道生哀文

嗟爾道生和氏之寶玉顏豐下曜於懷抱暮春而育孟
冬而夭二十三旬奇于五日方之期頤百分之一命之

脩短始則有終誰能長久與天無窮錢翁近千殤子幼
冲俱反無形冥昧之中造化多少豈獨爾躬

和氏外孫小同哀文

曄曄薨華朝生夕落爾命方之猶為淺薄暫有冥質尋
反冥漠譬彼蜉蝣不識晦朔死尚未知生亦焉知爾雖
旬月我未之視萬物混焉天地一指杪末嬰孩安足稱
誄大人達觀同之一揆

詩

答弘農故吏民

昔我先侯邁德垂化康哉之詠實由良佐惟余忝辱弗克負荷每歷貴邦仰瞻泰華追慕先軌感想哀嗟詵詵臣故爰及羣士皓首老成率彼邑里闡崇高義長幼以齒

除婦服詩

婦胡母氏也

時邁不停日月電流神異登遐忽已一周禮制有叙告除靈丘臨祠感痛中心若抽

征西官屬送於陟陽侯作詩

晨風飄岐路零雨被秋草傾城遠追送餞我千里道三
命皆有極咄嗟安可保莫大於殤子彭聃猶為夭吉凶
如糾纏憂喜相紛繞五臣作擾天地為我鑪萬物一何小連
人垂大觀誠此苦不早乖離即長衢惆悵盈懷抱孰能
察其心鑒之以蒼昊齊契在今朝守之與偕老

太僕座上詩

以下
關文

朝欽厥庸出尹京畿迴授太僕四牡駢駢綠耳盈箱翠

華歲凝勲齊庭實增國之輝

祖道詩

仰天惟龍御地以驥利有攸往不期而至

之馮翊祖道詩

舉翮撫三秦抗我千里目念當隔山河執觴懷慘毒

漢魏六朝百三家集卷四十一